

Incumbensa Caluori concernent la deducziun fiscala per la tgira ed assistenza gratuita da personas che basegnan sustegn

L'onn 2016 èn vegnidas prestadas en l'entira Svizra 80 milliuns uras lavur gratuita per la tgira ed assistenza da personas. Var 2/3 da las personas che tgeran ed assistan sin basa privata han er in'actividad professionala.

Il dumber da personas che assistan e tgeran confamigliars è sa reduci tendenzialmain ils onns 2000 fin 2013. Da quai resulta che personas che basegnan tgira èn dependentas tendenzialmain pli baud che propi necessari da purschidas da tgira (p.ex. spitex) u ston vegnir collocadas en instituziuns da tgira (p.ex. chasas da dimora). Ils custs per quai vegnan surpigliads per gronda part dal maun public. Cun ina deducziun fiscala per prestaziuns da tgira gratuitas furnidas sin basa privata poi vegnir fatg frunt a questa tendenza. La tgira gratuita privata duai survegnir dapli stima dal stadi.

D'ina deducziun fiscala duain profitar quellas personas che tgeran ed assistan lur confamigliars e che pon cumprovar ch'ellas dovran dapli temp e lavur da coordinaziun, uschia per exempel:

- per gidar a lavar il corp, per mobilisar e per mantegnair l'actividad corporala;
- per gidar a planisar ed a dumagnar il mintgadi (incl. accompagnar a termins externs);
- per preparar e per cuschar regularmain pasts;
- per liquidar lavurs da tegnairchasa sco nettegiar, dustar ruments, lavar e.u.v.

Simpels agids (p.ex. far cumissiuns, svidar la chascha da brevs e.u.v.) sco er prestaziuns d'assistenza en il rom da las obligaziuns genituralas n'autoriseschan betg da far ina deducziun.

Ils criteris ston vegnir fixads da la regenza. Pussaiavel è er in cunfin da temp minimal per prestaziuns furnidas u per exempel il basegn da sustegn e da tgira cumprovà dal medi.

Deducziuns fiscalas socialas èn legitimas e pon vegnir concludidas dals chantuns. Fin ussa na datti betg ina pussaivladad da deducziuns per prestaziuns da tgira e d'assistenza privatas en il Grischun.

Las sutsegnadras ed ils sutsegnaders proponan a la regenza da suttametter al cussegl grond ina revisiun parziala da la lescha da taglia per il chantun Grischun che prevesa che personas che tgeran ed assistan voluntarmain e gratuitamain personas basegnusas pon deducir mintga onn 5000 francs da las entradas suttamessas a la taglia.

Puntraschigna, ils 13 da zercladur 2019

Caluori, Hitz-Rusch, Rettich, Berther, Bondolfi, Brandenburger, Brunold, Cantieni, Casutt-Derungs, Cavegn, Clalüna, Crameri, Deplazes (Rabius), Derungs, Dürler, Engler, Epp, Fasani, Florin-Caluori, Föhn, Gasser, Geisseler, Hartmann-Conrad, Hefti, Holzinger-Loretz, Jenny, Kappeler, Kasper, Kohler, Kunfermann, Loepfe, Maissen, Noi-Togni, Paterlini, Preisig, Ruckstuhl, Sax, Schmid, Schneider, Tanner, Tomaschett (Breil), Tomaschett-Berther (Trun), Ulber, von Ballmoos, Waidacher, Weber, Widmer (Felsberg), Widmer-Spreiter (Cuira), Zanetti (Landquart), Pajic